

**Siunnersuut uunga: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2014-imeersoq**  
(tuniniaanissamik nittarsaassisarnermut inatsit).  
(Inuussutissarsiornermut Aatsitassanullu Naalakkersuisoq)

**Saqqummiussissut**  
(Inuussutissarsiornermut Aatsitassanullu Naalakkersuisoq)

**Siullermeerinninneq**  
Naalakkersuisut sinnerlugit matumuuna tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisissaannut siunnersuut saqqummiutissavara.

Atuisartunut pisisartunullu siunnersuisartoqatigiit, tuniniaasarneq, nalunaaqutsersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit Inatsisartut inatsisaat atuuttoq ulloq 13. november 1986 atuutilerpoq. Tamatuma kingorna inatsimmut allannguutaasartuni ataasiinnaq tuniniaanissamik nittarsaassinermut tunngatillugu aalajangersakkanut tunngassuteqarpoq, 2001-imi meqqinik, allagartanik assigisaannilluunniit pisinisaaq sioqqullugu atugassiisuteqarnikkut akikillisaasarnissamik imaluunniit allatut sullissinissamik inerteqquteqarneq atuutsinneqalerluni. Tuniniaanissamik nittarsaassisarnermut tunngatillugu aalajangersakkat atuuttut taamaalillutik 1986-imi inatsisip atuutsinneqalerneraneersuunerupput.

Tamatuma malitsigisaanik inatsit atuuttoq, inatsisip atuutsinneqalerneraniilli inuiaqatigiinni ineriartornermut naleqqiullugu isigissagaanni ullutsinnut naleqqukkunnaarpoq.

Taamaattumik siunnersuummi atuisartut pisisartullu illersorneqarnerat suliaasaqarfinni arlalinni annertusineqarpoq, ilanngullugu atortunut elektroniskiusunut siusinnerusukkut maleruagassiivigineqarsimanngitsunut tunngatillugu. Taamaattumik Naalakkersuisut tungaanniit taassuma naleqqussarneqarnissaa pingaartinneqarpoq aammalu politikkikkut kissaatigineqarluni, taamaalilluni taanna Kalaallit Nunaanni ullumikkut pisunut naleqqutilissalluni, pingaartumik atituumik atuisunik illersuinissamut tunngatillugu kiisalu atuisut pisinnaatitaaffii pillugit paasissutissiisarnermut tunngatillugu.

Taamatuttaaq neqeroorutitsialaat sapinngisamik amerlanerpaanit paasineqarsinnaanissaasa atorineqarsinnaanissaasalu qulakkeerneqarnissaa siunertaralugu, inini tamanit orninneqartartuni tuniniaanissamik nittarsaassinerup kalaallisut pisarnissaa pillugu siunnersuut aalajangersakkanik imaqarpoq.

Siunnersuutip malitsigisaanik Atuisartunut Pisisartunullu Siunnersuisartoqatigiinnut taarsiullugu Atuisartoqarnermut Unammilleqatigiinnermullu Aqutsisoqarfik

pilersinneqassaaq. Atuisartoqarnermut Unammilleqatigiinnermullu Aqutsisoqarfiup siunnersuummi aalajangersakkat malinneqarnerannut nakkutilliineq kiisalu nalinginnaasumik siunnersuisarneq isumagisarisussaassavai. Siunnersuutip aamma malitsigisaanik inuussutissarsiummik ingerlataqartut tuniniaanissamut nittarsaassinernut suliniuteqarnissanik eqqarsaatigineqartunik Atuisartoqarnermut Unammilleqatigiinnermullu Aqutsisoqarfimmi nalilersuisitsisarnissamut periarfissaqalissapput.

Taamatuttaaqaq Atuisartoqarnermut Unammilleqatigiinnermullu Aqutsisoqarfiup atuisartunit pisisartunillu inuussutissarsiummik ingerlataqartut naammagittaalliuutigineqarneri, siusinnerusukkut Atuisartunut Pisisartunullu maalaaruteqartarfittut ataatsimiititaliamit suliarineqartartut, suliarisassavai.

Tamanna suliaassanik suliarinnittarnerup sukkanerujussuarmik ingerlanneqartalerneranik malitseqassaaq.

Taamatuttaaqaq Atuisartoqarnermut Unammilleqatigiinnermullu Aqutsisoqarfiup paasititsiniaanermut suliassaanut ilaatillugu aqutsisoqarfik sinerissami paasititsiniaalluni angalasassasoq naatsorsuutigineqarpoq, taamatullu aqutsisoqarfik Nuup avataaniit naammagittaalliuutaasunik tiguisinnaassalluni suliarinnissinnaassallunilu.

Naalakkersuisut tungaanniit isumaqarpugut siunnersuut manna atuisartunut pisisartunullu annertuunik pitsaanerulersitsissasoq kiisalu suliassanik suliarinnittarneq sunniuteqarluarnerulerlunilu sukkanerulissasoq.

Taamatut oqaaseqarlunga siunnersuut Inatsisartuni suliarineqartussanngortippara.